



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2010. GODINU STRANKE DEMOKRATSKE AKTIVNOSTI

Broj: 03-07-6-430/11  
Sarajevo, 7. maj 2012. godine

## SADRŽAJ

|  |   |
|--|---|
| MIŠLJENJE REVIZORA.....                                  | 3 |
| 1. UVOD.....   | 4 |
| 2. PREDSTAVLJANJE POLITIČKE STRANKE.....                 | 4 |
| 3. OPIS PREGLEDA I KONTROLE FINANSIJSKOG IZVJEŠTAJA..... | 5 |
| Predmet pregleda i kontrole .....                        | 5 |
| Cilj pregleda i kontrole .....                           | 5 |
| Obim pregleda i kontrole .....                           | 5 |
| 4. PRETHODNE KONTROLE I REVIZIJE.....                    | 5 |
| 5. NALAZI I PREPORUKE.....                               | 5 |
| 5.1. NALAZI .....  | 5 |
| 5.2. PREPORUKE.....                                      | 9 |

## **MIŠLJENJE REVIZORA**

Služba za reviziju finansiranja političkih stranaka izvršila je pregled finansijskih izvještaja Stranke demokratske aktivnosti i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata općih izbora, održanih u oktobru 2010. godine.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i članom 15.10 Izbornog zakona BiH i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

**Stranka demokratske aktivnosti nije ispoštovala odredbe člana 5. stav (1), člana 6., člana 8. stav (1) i (2) i člana 11. stav (1) i (3) Zakona o finansiranju političkih stranaka jer je primila prilog pravnog lica iznad Zakonom propisanog limita, nije prijavila prilog fizičkog lica, primila je zabranjene priloge, ne vodi adekvatne evidencije o svojim prihodima i rashodima i izvještaj nije popunila u skladu sa Pravilnikom o godišnjim finansijskim izvještajima političkih stranaka.**

**Pregledom, odnosno kontrolom finansijskog izvještaja, osim gornjih napomena nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka niti na finansiranje troškova izborne kampanje suprotno odredbama člana 15.10 Izbornog zakona BiH.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled finansijskih izvještaja Stranke demokratske aktivnosti i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata općih izbora, održanih u oktobru 2010. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Stranka demokratske aktivnosti je iskazala ukupne prihode u iznosu od 263.036,20 KM, čija struktura je data u sljedećoj tabeli:

| Red. br. | Vrsta prihoda          | Iznos u KM        | Učešće u uk. prih. % |
|----------|------------------------|-------------------|----------------------|
| 1        | Članarina              | 0,00              |                      |
| 2        | Prilozi fizičkih lica  | 31.974,82         | 12,16%               |
| 3        | Prilozi pravnih lica   | 20.150,00         | 7,66%                |
| 4        | Prihodi od imovine     | 0,00              |                      |
| 5        | Prihodi od pr.lica     | 0,00              |                      |
| 6        | Prihodi od poklona     | 0,00              |                      |
| 7        | Prihodi iz budžeta     | 210.911,38        | 80,18%               |
|          | Ostali prihodi         | 0,00              |                      |
|          | <b>Ukupni prihodi:</b> | <b>263.036,20</b> | <b>100,00%</b>       |

U godišnjem finansijskom izvještaju politička stranka je iskazala ukupne rashode u iznosu od 303.747,53 KM.

## 2. PREDSTAVLJANJE POLITIČKE STRANKE

Naziv političke stranke: Stranka demokratske aktivnosti. Skraćeni naziv: A-SDA.

Politička stranka je registrovana 08.02.2008. godine u Općinskom sudu u Bihaću, broj upisa 017-0-RegPo-08-000002.

Sjedište političke stranke je u Cazinu, Ulica cazinskih brigada bb.

Za zastupanje stranke ovlašten je Izet Hadžić, predsjednik stranke.

Lice ovlašteno za podnošenje finansijskih izvještaja za 2010. godinu je Muhamed Alić.

Prema podacima iz godišnjeg finansijskog izvještaja za 2010. godinu, Stranka demokratske aktivnosti ima niže nivoe organizovanja i to:

- Centrale Cazin, Tuzla i Sarajevo
- 1 kantonalni odbor i
- 19 općinskih odbora.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Stranke demokratske aktivnosti za 2010. godinu i finansijski izvještaj za period od dana podnošenja prijave za ovjeru za izbore do dana ovjere rezultata općih izbora, održanih u oktobru 2010. godine.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka i da li su troškovi predizborne kampanje u okviru zakonom dozvoljenih.

**Obim pregleda i kontrole** finansijskih izvještaja Stranke demokratske aktivnosti obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka i odredbama člana 15.10 Izbornog zakona BiH, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta, priloge pravnih lica, priloge fizičkih lica i troškove predizborne kampanje.

### 4. PRETHODNE KONTROLE I REVIZIJE

Služba za reviziju je u prethodnom periodu izvršila reviziju godišnjeg finansijskog izvještaja Stranke demokratske aktivnosti za 2008. godinu, nakon koje je izdat izvještaj o reviziji sa mišljenjem revizora, nalazima i preporukama.

Služba za reviziju je, takođe, izvršila pregled godišnjeg finansijskog izvještaja Stranke demokratske aktivnosti za 2009. godinu, nakon kojeg je izdat izvještaj o pregledu sa mišljenjem revizora, nalazima i preporukama revizije, da Stranka demokratske aktivnosti treba postupiti u skladu sa odredbama člana 8. stav (1) i člana 11. stav (1) i stav (3) Zakona o finansiranju političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2010. godinu, utvrđeno je da politička stranka nije ispoštovala preporuke koje su date u izvještaju o pregledu finansijskih izvještaja za 2009. godinu, odnosno postupila je suprotno odredbama člana 8. stav (1) i člana 11. stav (1) i stav (3) Zakona o finansiranju političkih stranaka.

### 5. NALAZI I PREPORUKE

#### 5.1. NALAZI

- a) **Na osnovu obavljenog pregleda godišnjeg finansijskog izvještaja i dodatne dokumentacije utvrđeno je da je Stranka demokratske aktivnosti prekršila odredbe člana 5. stav (1) Zakona o finansiranju političkih stranaka.<sup>1</sup>**

---

<sup>1</sup> Prema odredbama člana 5. stav (1) Zakona o finansiranju političkih stranaka, ukupan iznos priloga jednog lica iz člana 4. stav (1) Zakona ne smije premašiti osam prosječnih plata prema zvaničnim podacima Agencije za statistiku BiH u jednoj kalendarskoj godini.

Stranka je ostvarila prilog preko limita u iznosu od 8.616,00 KM primivši novčana sredstva dana 18.06.2010. godine od Stranke za Bosnu i Hercegovinu u iznosu od 15.000,00 KM, što je suprotno odredbama člana 5. stav (1) Zakona.<sup>2</sup>

**b) Stranka demokratske aktivnosti je prekršila odredbe člana 6. Zakona o finansiranju političkih stranaka.<sup>3</sup>**

U godišnjem finansijskom izvještaju stranka nije prijavila prilog fizičkog lica u iznosu od 200,00 KM. Uporedbom podataka iz finansijskog izvještaja koji je Stranka demokratske aktivnosti dostavila Centralnoj izbornoj komisiji BiH sa podacima iz baze podataka Agencije za identifikacione dokumente, evidenciju i razmjenu podataka, utvrđeno je da jedno fizičko lice navedeno u Obrascu 3-a (Prilozi fizičkih osoba veći od 100 KM) nije stvarni donator. Naime, kontrolom imena i prezimena, te JMBG koje je stranka prijavila kao donatore, utvrđeno je da se isti ne nalazi u navedenoj bazi podataka.

**c) Stranka je prekršila odredbe člana 8. stav (1) i stav (2) Zakona o finansiranju političkih stranaka.<sup>4</sup>**

- Stranka je primila prilog u iznosu od 1.000,00 KM dana 13.09.2010. godine od fizičkog lica čiji podaci o imenu, prezimenu i JMBG se ne nalaze u bazi podataka Agencije za identifikacione dokumente, evidenciju i razmjenu podataka. U skladu sa navedenim pouzdano se može tvrditi da je jedno fizičko lice navedeno u Obrascu 3-a (Prilozi fizičkih osoba veći od 100 KM) koje je stranci dalo prilog anonimni donator, što je suprotno odredbama člana 8. stav (1) Zakona o finansiranju političkih stranaka.<sup>5</sup>
- Stranka, odnosno njena dva (2) organizaciona dijela, bez plaćanja su koristili poslovne prostorije općinskih organa uprave, što nije u skladu sa odredbama člana 8. stav (1) Zakona o finansiranju političkih stranaka.

Stranka demokratske aktivnosti za potrebe rada Općinskog odbora Živinice koristi prostorije u vlasništvu Općine Živinice površine 15 m<sup>2</sup>. Uvidom u finansijski izvještaj stranka je na troškovima zakupa za 2010. godinu iskazala 250,00 KM. Obzirom da, prema Odluci Općine, cijena zakupa iznosi 3 KM/m<sup>2</sup> mjesečno, cijena zakupa na godišnjem nivou iznosi 540,00 KM, a razlika u iznosi od 290,00 KM predstavlja zabranjeni prilog stranci.

Općinski odbor A-SDA Bosanska Krupa je ostvario zabranjeni prilog koristeći bez naknade kancelariju površine 13,60 m<sup>2</sup> u Poslovnoj zgradi – Matični ured u vlasništvu Općine Bosanska Krupa.

---

<sup>2</sup> S obzirom da su sredstva primljena prije 13.07.2010. godine od kada je na snazi Zakon o izmjenama i dopunama Zakona o finansiranju političkih stranaka kojim je limit na visinu priloga povećan na 15 prosječnih neto plata.

<sup>3</sup> Ako ukupan iznos priloga jednog lica iz stava (1) člana 4. Premašuje 100 KM, ta uplata mora da se unese u finansijski izvještaj u skladu sa članom 11. (Član 6.) Zakona.

<sup>4</sup> Državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke. (Član 8. stav 1.)

Privatna preduzeća koja obavljaju javne usluge na osnovu ugovora sa vladom ne mogu finansijski pomagati političke stranke (Član 8. stav 2.)

<sup>5</sup> Obzirom da su izmjene Zakona stupile na snagu 13.07.2010. godine, prema odredbama člana 8. stav (1) Zakona o izmjenama i dopunama Zakona o finansiranju političkih stranaka državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

- Stranka je primila zabranjene priloge u ukupnom iznosu od 1.700,00 KM od tri pravna lica koja su u 2010. godini vršili nabavku roba i usluga na osnovu sklopljenih ugovora sa vladom, što je suprotno odredbama člana 8. stav (2) Zakona o finansiranju političkih stranaka.

Preduzeće za puteve Mostar je dalo prilog stranci u iznosu od 1.000,00 KM. Obzirom da je navedeno preduzeće sa Opštinom Ljubuški sklopilo Ugovor o održavanju lokalnih i nerazvrstanih cesta, stranka je ostvarila zabranjeni prilog u iznosu od 1.000,00 KM od navedenog preduzeća.<sup>6</sup>

Takođe, firma Se-Sarajka je dala prilog stranci u iznosu od 200,00 KM koji je zabranjen zakonom, jer je navedena firma izvršila usluge Općini Tuzla u 2010. godini po osnovu tri sklopljena ugovora i to: Ugovor o izvođenju radova rušenja objekta barake, Ugovor o izvođenju radova na održavanju nekategorisanih i lokalnih puteva na području Općine Tuzla i Ugovor o izvođenju radova na izgradnji višenjamenskog igrališta u Mjesnoj zajednici Dokanj u Tuzli.<sup>7</sup>

Na isti način stranka je ostvarila zabranjeni prilog od firme Tuzla farm doo Tuzla u iznosu od 500,00 KM, jer je Tuzla farm doo Tuzla u 2010. godini sa Zavodom zdravstvenog osiguranja i reosiguranja Federacije Bosne i Hercegovine i sa Vladom Brčko Distrikta – Odjeljenjem /Odjelom za zdravstvo i ostale usluge sklopila više različitih Ugovora za isporuku određenih medikamenata.<sup>8</sup>

**d) Stranka demokratske aktivnosti je prekršila odredbe člana 11. stav (1) i (3) Zakona o finansiranju političkih stranaka.<sup>9</sup>**

- Stranka ne vodi adekvatne evidencije o svojim prihodima i rashodima, što je suprotno odredbama člana 11. stav (1) Zakona o finansiranju političkih stranaka.

Uvidom u poslovne knjige stranke utvrđeno je da je stranka za svoje općinske odbore u okviru ostalih prihoda u iznosu od 2.165,45 KM evidentirala razlike između knjigovodstvenog početnog stanja po transakcijskim računima općinskih odbora i stvarnog stanja po izvodima broj 1. Navedene evidencije stranka je napravila kako bi ispravila propuste iz prethodnog perioda, a pri tome je neosnovano uvećala prihode za naprijed navedenih iznos.

Stranka je u okviru Ukupnih prihoda političke stranke iskazala prihode iz budžeta u manjem iznosu od stvarnog za 1.668,00 KM. U Obrascu 3-f finansijskog izvještaja (Prihodi iz budžeta) stranka je iskazala prihod koji je primila iz budžeta Općine Živinice u iznosu od 26.245,00 KM.

Uvidom u akt Općine Živinice<sup>10</sup> utvrđeno je da je ovoj političkoj stranci iz budžeta navedene općine uplaćeno 27.913,00 KM. Od toga je 26.245,00 KM uplaćeno na račun stranke, a 1.668,00 KM Općina Živinice je po zahtjevu vijećnika uplatila na privatni račun fizičkog lica. Neiskazivanjem

<sup>6</sup> Akt Općine Ljubuški broj 03/3-14-1098/11+1 od 04.10.2011. godine

<sup>7</sup> Akt Općine Tuzla broj 05-03/15-23-sl./11 od 15.07.2011. godine.

<sup>8</sup> Akt Zavoda za zdravstveno osiguranje i reosiguranje Federacije Bosne i Hercegovine broj 01/III-05-2-1614/11 od 03.08.2011. godine i Akt Vlade Brčko Distrikta – Odjeljenje /Odjel za zdravstvo i ostale usluge broj 05-0070BF-02/11 od 16.08.2011. godine.

<sup>9</sup> Prema odredbama člana 11. stav (1) Zakona o finansiranju političkih stranaka, političke stranke su obavezne da vode evidencije o svojim prihodima i rashodima.

U skladu sa odredbama člana 11. stav (3) Zakona o finansiranju političkih stranaka, stranka podnosi finansijski izvještaj u formi koju odobri Centralna izborna komisija, a u skladu s tim donesen je Pravilnik o godišnim finansijskim izvještajima političkih stranaka kojim su propisani sadržaj i forma finansijskog izvještaja („Službeni glasnik BiH“ broj 61/06).

<sup>10</sup> Akt Općine Živinice broj 03/1-14-5644/11 od 04.10.2010. godine.

primljenih sredstava u finansijskom izvještaju stranka je postupila suprotno odredbama člana 19. stav (1) Pravilnika o godišnjim finansijskim izvještajima političkih stranaka.<sup>11</sup>

Stranka u oviru ukupnih prihoda nije iskazala Ostale prihode u iznosu od 2.198,34 KM koje se odnose na kamate i sravnjenja za neslaganje početnih stanja kod transakcijskih računa općinskih odbora.

Stranka u finansijskom izvještaju u okviru organizacione strukture nije iskazala Odbor Sarajevo. Takođe, stranka nije iskazala niti troškove zakupa za Odbor Sarajevo u iznosu od 6.000,00 KM za 2010. godinu. Uvidom u dostavljenu dokumentaciju utvrđeno je da je stranka sklopila Ugovor o zakupu sa fizičkim licem iz Sarajeva, vlasnikom prostorija u ulici Hamdije Kreševljakovića u Sarajevu čija mjesečna zakupnina iznosi 500,00 KM.

U obrascu 4-1 (Režijsko-administrativni i ostali troškovi) stranka je iskazala naknadu za autorski honorar u iznosu od 3.100,00 KM i usluge posredovanja u iznosu od 15.000,00 KM. Uvidom u dokumentaciju utvrđeno je da je stranka sklopila Ugovor o djelu za fizičkim licem radi izrade Web stranice stranke. Stranka je u skladu sa odredbama člana 11. stav (1) Zakona o finansiranju političkih stranaka bila obavezna izvršiti klasifikaciju troškova po osnovu usluga koje su stranci izvršene preko studentskih servisa i troškova koje su stranci izvršene po ugovoru o djelu.

U skladu sa odredbama člana 11. stav (3) Zakona o finansiranju političkih stranaka i odredbama člana 21. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06), politička stranka je bila obavezna da u finansijskom izvještaju troškove iskaže po vrstama troška, a ne prema izvršiocu usluge.

- Finansijski izvještaj nije popunjen u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

U obrascu 4-1 finansijskog izvještaja (Režijsko-administrativni i ostali troškovi) stranka je iskazala troškove zakupa korištenja sala u Bosanskoj Krupi u iznosu od 830,00 KM. Uvidom u jedan od računa u iznosu od 400,00 KM utvrđeno je da se isti odnosi na zakup sale u periodu održavanje predizborne kampanje. Navedeni iznos stranka je imala obavezu iskazati u obrascu Troškova propagande u okviru ostalih troškova. Pogrešnim klasifikovanjem troška stranka je postupila suprotno odredbama člana 21. Pravilnika o godišnjim finansijskim izvještajima političkih stranaka.<sup>12</sup>

U obrascu 5 finansijskog izvještaja (Pozajmice, krediti i dugovi) stranka nije iskazala sve obaveze prema dobavljačima i to za Centralu A-SDA Cazin u iznosu od 1.106,90 KM i Centralu A-SDA Tuzla u iznosu od 7.154,55, što je suprotno odredbama člana 23. stav (1b) Pravilnika.<sup>13</sup>

### **Troškovi predizborne kampanje**

Stranka demokratske aktivnosti postupila je u skladu sa odredbama člana 15.10 Izbornog zakona BiH, odnosno u svrhu izborne kampanje su potrošili 69.919,40 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM<sup>14</sup> po biraču u svakom izbornom krugu, prema broju

<sup>11</sup> U skladu sa članom 19. stav (1) Pravilnika u obrazac 3-f (Prihodi iz budžet) popunjava se na nivou političke stranke i u njemu se evidentiraju sva sredstva iz budžeta svih nivoa vlasti koja je politička stranka primila u izvještajnom periodu.

<sup>12</sup> U skladu sa članom 21. Pravilnika o godišnjim finansijskim izvještajima političkih stranaka u obrazac 4-1 – Režijsko-administrativni i ostali troškovi, unose se svi troškovi osim troškova propagande, i sljedeći podaci: naziv organizacionog dijela političke stranke, vrsta troška, konto i iznos.

<sup>13</sup> U obrazac 5 u okviru Ukupnih obaveza po dugovanjima unose se sljedeći podaci: naziv povjerioca, iznos duga, visina rate i rok vraćanja duga.



birača koje je objavila Centralna izborna komisija BiH. Prema podacima Centralne izborne komisije BiH, Stranka demokratske aktivnosti je u svrhu izborne kampanje mogla da potroši 2.699.020,70 KM.

## 5.2. PREPORUKE

*Preporučuje se Stranci demokratske aktivnosti da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da postupa u skladu sa članom 5.stav (1) Zakona o finansiranju političkih stranaka odnosno da ne prima priloge preko limita,*
- *da postupa u skladu sa odredbama člana 6. Zakona o finansiranju političkih stranaka odnosno da prijavljuje svoje prihode,*
- *da postupa u skladu sa članom 8. stav (1) i (2) Zakona o finansiranju političkih stranaka odnosno da se ne finansira prihodima zabranjenim ovim Zakonom i*
- *da postupa u skladu sa odredbama člana 11. stav (1) i (3) Zakona o finansiranju političkih stranaka odnosno da vodi adekvatne evidencije o prihodima i rashodima te da finansijske izvještaje koje podnosi Centralnoj izbornoj komisiji BiH sačinjava u formi propisanoj Pravilnikom o godišnjim finansijskim izvještajima političkih stranaka.*

## KOMENTAR

Stranka demokratske aktivnosti nije se očitovala na nalaze revizije i mišljenje revizora dato u preliminarnom izvještaju o pregledu godišnjeg finansijskog izvještaja za 2010. godinu koji je stranci dostavljen 29.11.2011. godine.

Mr. Hasida Gušić, šef Službe za reviziju

Veliborka Kenjić, revizor

---

<sup>14</sup> Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.